

**Evangelium vum Héichfest vum hellege Jouseph [19. Mäerz]
(Joer A - B - C)**

Lk 2,41-51a

- G. *Den Här sief mat iech all.*
A. *An och mat lech.*
G. *Aus dem hellegen Evangelium nom Lukas.*
A. *Dir all Éier, Här.*

- 41 Dem Jesus seng Eltere
sinn all Joer fir d'Pessach-Fest erop op Jerusalem gaang.
- 42 Wéi hien zwielef Joer al gi war,
goungen si nees doropper, esou wéi et de Brauch fir d'Fest war.
- 43 No de Feierdeeg,
wéi si sech op den Heemwee gemaach hunn,
ass d'Kand, de Jesus, zu Jerusalem zrëckbliwwen,
ouni datt seng Elteren et an Uecht geholl hunn.
- 44 An der Meenung, hie wär bei anere Pilger vum Grupp,
sinn si e ganzen Dag laang gaang;
eréischt dunn hunn si hie bei hiner Famill an hire Bekannte gesicht.
- 45 Wéi si hien net fonnt hunn,
sinn si hannescht op Jerusalem gaang an hunn do no him gesicht.
- 46 No dräi Deeg hunn si hien am Tempel fonnt.
Hie souz matzen ënner de Léiermeeschter,
huet hinnen nogelauschtert
an huet hinne Froe gestallt.
- 47 All déi, déi hien héieren hunn, ware paff iwwer säi Verstand
an iwwer d'Äntwerten, déi hie ginn huet.
- 48 Wéi seng Elteren hie gesinn hunn, waren si ausser sech,
an seng Mamm sot zu him:
"Kand, wéi konns du äis dat undoen?
Kuck, däi Papp an ech, mir hunn dech voller Angscht gesicht!"
- 49 Du sot hien zu hinnen:
"Firwat hutt dir mech gesicht?
Wusstt dir dann net,
datt ech an deem si muss, wat mengem Papp gehéiert?"

50 Si awer hunn dat, wat hien hinne gesot huet, net verstan.

51a Dunn ass hie mat hinnen erof op Nazareth gaang,
an hie war sengen Elteren ënnerdon.

G. Evangelium vun eiser Här Jesus Christus.

A. Dech, Christus, luewe mir.